

**ЎЗБЕКИСТОН РЕСПУБЛИКАСИ ВАЗИРЛАР МАҲКАМАСИНИНГ
ҚАРОРИ
29.12.2012 й.
N 367**

**ЎРТА МАХСУС, КАСБ-ҲУНАР ТАЪЛИМИ МУАССАСАЛАРИ
ЎҚУВЧИЛАРИ ЎҚИШИНИ КЎЧИРИШ, ҚАЙТА ТИКЛАШ ВА
ЎҚИШДАН ЧЕТЛАШТИРИШ ТАРТИБИНИ ТАКОМИЛЛАШТИРИШ
ҲАҚИДА**

1-илова. Ўзбекистон Республикаси ўрта махсус, касб-хунар таълими муассасалари ўқувчилари ўқишини кўчириш, қайта тиклаш ва ўқишдан четлаштириш тартиби тўғрисида Низом

2-илова. Ҳарбий академик лицейлар ўқувчиларини ўқишдан четлаштириш ва бошқа таълим муассасасига ўтказиш тартиби тўғрисида Низом

"Таълим тўғрисида"ги Ўзбекистон Республикаси Қонунининг ижросини таъминлаш ҳамда таълим тизимида ислохотлар доирасида белгиланган вазифаларни изчил ва сифатли амалга ошириш, ўрта махсус, касб-хунар таълими муассасалари ўқувчилари ўқишини кўчириш, қайта тиклаш ва ўқишдан четлаштириш тартибини янада такомиллаштириш мақсадида Вазирлар Маҳкамаси **ҚАРОР ҚИЛАДИ:**

1. Қуйидагилар:

Ўзбекистон Республикаси ўрта махсус, касб-хунар таълими муассасалари ўқувчилари ўқишини кўчириш, қайта тиклаш ва ўқишдан четлаштириш тартиби тўғрисидаги низом 1-иловага мувофиқ;

Ҳарбий академик лицейлар ўқувчиларини ўқишдан четлаштириш ва бошқа таълим муассасасига ўтказиш тартиби тўғрисидаги низом 2-иловага мувофиқ тасдиқлансин.

2. Ўзбекистон Республикаси Олий ва ўрта махсус таълим вазирлиги манфаатдор вазирликлар ва идоралар билан биргаликда бир ой муддатда идоровий норматив-ҳуқуқий ҳужжатларни ушбу қарорга мувофиқлаштирсин.

3. Мазкур қарорнинг бажарилишини назорат қилиш Ўзбекистон Республикаси Бош вазирининг ўринбосари А.И. Икрамов зиммасига юклансин.

Ўзбекистон Республикасининг Бош вазири

Ш. Мирзиёев

"Ўзбекистон Республикаси қонун ҳужжатлари тўплами", 2013 йил, 1-сон, 6-модда

**Ўзбекистон Республикаси ўрта махсус, касб-хунар таълими
муассасалари ўқувчилари ўқишини кўчириш, қайта тиклаш ва ўқишдан
четлаштириш тартиби тўғрисида
НИЗОМ**

- I. Умумий қоидалар
- II. Ўқишни кўчириш тартиби
- III. Ўқишни қайта тиклаш тартиби
- IV. Ўқувчилар сафидан четлаштириш тартиби
- V. Яқунловчи қоидалар

I. УМУМИЙ ҚОИДАЛАР

1. Ушбу Низом ўрта махсус, касб-хунар таълими муассасалари ўқувчилари ўқишини кўчириш, қайта тиклаш ва ўқишдан четлаштириш тартибини белгилайди.

2. Ўрта махсус, касб-хунар таълими муассасалари ўқувчилари ўқишини кўчириш, қайта тиклаш ва ўқишдан четлаштириш масалалари Ўзбекистон Республикаси фуқароларининг мажбурий ўрта махсус, касб-хунар таълими олиш ҳуқуқини инобатга олган ҳолда ҳал этилади.

3. Ўқувчиларнинг ўқишини бир ўрта махсус, касб-хунар таълими муассасасидан бошқасига кўчириш, шунингдек илгари ўқишдан четлаштирилган ўқувчиларни ўқишга қайта тиклаш, қоидага кўра, ёзги таътил даврида, тегишли курс (семестр)да ўқув машғулотлари бошланишига қадар амалга оширилади.

4. Ўрта махсус, касб-хунар таълими муассасаларида ўқишни кўчириш ёки қайта тиклаш жараёни бепул амалга оширилади.

5. Ўрта махсус, касб-хунар таълимининг тайёрлов йўналишлари, касблар ва ихтисосликлар таснифлагичига мувофиқ (кейинги ўринларда - Таснифлагич деб юритилади) бир тайёрлов йўналиши доирасида ўқувчилар ўқишини бир таълим муассасаси доирасида кўчириш ушбу ўрта махсус, касб-хунар таълими муассасаси директорининг буйруғи билан амалга оширилади.

6. Бир минтақа (Қорақалпоғистон Республикаси, вилоятлар ва Тошкент шаҳри) доирасида ўқувчилар ўқишини Ўзбекистон Республикаси Олий ва ўрта махсус таълим вазирлигининг Ўрта махсус, касб-хунар таълими маркази тасарруфидаги бир ўрта махсус, касб-хунар таълим муассасасидан Таснифлагичнинг бир билим соҳаси ичидаги бошқа таълим муассасасига кўчириш ўрта махсус, касб-хунар таълими тегишли ҳудудий бошқармасининг рухсати билан амалга оширилади.

7. Қуйидаги ҳолларда ўқувчилар ўқишини кўчириш ва қайта тиклаш Ўзбекистон Республикаси Олий ва ўрта махсус таълим вазирлигининг Ўрта махсус, касб-хунар таълими маркази рухсати билан амалга оширилади:

а) бошқа давлатларнинг таълим муассасаларида таҳсил олган Ўзбекистон Республикаси фуқароларининг ўқишини республика ўрта махсус, касб-хунар таълими муассасаларига кўчириш;

б) ўрта махсус, касб-хунар таълими муассасалари ўқувчиларини оналари билан биргаликда доимий яшаш учун Ўзбекистон Республикаси ташқарисига чиқиб кетиши муносабати билан ўқишдан четлаштириш;

в) ўқувчиларни бир минтақадаги ўрта махсус, касб-хунар таълими муассасаларидан бошқа минтақаларнинг (Қорақалпоғистон Республикаси, вилоятлар ва Тошкент шаҳри) ўрта махсус, касб-хунар таълими муассасаларига кўчириш;

г) бир ҳудуд доирасида ўқувчиларни бир ўрта махсус, касб-хунар таълими муассасаларидан турли вазирликлар (идоралар) тасарруфидаги бошқа ўрта махсус, касб-хунар таълими муассасасига кўчириш;

д) ўқувчиларни Таснифлагичга мувофиқ бир билим соҳасидан бошқа билим соҳасига кўчириш.

8. Ўрта махсус, касб-хунар таълими муассасалари ўқувчиларини бошқа вазирликлар (идоралар)нинг ўрта махсус касб-хунар таълими муассасаларга кўчириш ва қайта тиклаш Ўзбекистон Республикаси Олий ва ўрта махсус таълим вазирлигининг Ўрта махсус, касб-хунар таълими маркази томонидан кўрсатиб ўтилган вазирликлар (идоралар) билан келишган ҳолда амалга оширилади.

9. Ўқувчиларни кўчириш ва қайта тиклаш тўғрисидаги барча аризалар бевосита ўқувчилар ўқиётган ўрта махсус, касб-хунар таълими муассасасида қабул қилинади.

Кўриб чиқиш ўрта махсус, касб-хунар таълими муассасаси директори ваколатига кирадиган аризалар 20 августга қадар қабул қилинади.

Ўзбекистон Республикаси Олий ва ўрта махсус таълими вазирлигининг Ўрта махсус, касб-хунар таълими маркази ваколати доирасида кўриб чиқиладиган аризалар 1 августга қадар қабул қилинади ва ўрта махсус, касб-хунар таълими муассасаси томонидан ҳудудий вилоят бошқармаларига юборилади.

Ўзбекистон Республикаси Олий ва ўрта махсус таълими вазирлигининг Ўрта махсус, касб-хунар таълими маркази ваколати доирасида кўриб чиқиладиган аризалар ўрта махсус, касб-хунар таълими ҳудудий вилоят бошқармалари томонидан расмий хат билан Ўзбекистон Республикаси Олий ва ўрта махсус таълими вазирлигининг Ўрта махсус, касб-хунар таълими марказига юборилади.

10. Ўқувчиларнинг ўқишини кўчириш ёки қайта тиклашда ўрта махсус, касб-хунар таълими муассасаси директори томонидан ўқув режалари ва дастурларга фанлар бўйича фарқларни ёки қарзларни топшириш тартиби ва муддатлари (икки ойдан ортиқ бўлмаган), шунингдек ўқувчиларни ўқитиш курси белгиланади.

II. ЎҚИШНИ КЎЧИРИШ ТАРТИБИ

11. Ўқувчилар ўқишини бир ўрта махсус, касб-хунар таълими муассасасидан бошқасига кўчиришда ўрта махсус, касб-хунар таълими ҳудудий бошқармасига қўйидаги ҳужжатлар тақдим этилади:

а) ўқувчининг ёзма аризаси, ўқувчи вояга етмаган бўлса унинг ота-онасидан бирининг (ёки уларнинг ўрнини босувчи шахсларнинг) аризаси;

б) таълим муассасасининг номи, мутахассислик, курс, гуруҳ кўрсатилган ҳолда таълим муассасасининг гербли муҳри билан тасдиқланган рейтинг дафтарча нусхаси;

в) ўқувчи паспорти нусхаси, вояга етмагани сабабли паспорти бўлмаганда туғилганлик тўғрисидаги гувоҳнома ҳамда ота-онаси (ёки уларнинг ўрнини босувчи шахслар)нинг доимий яшаш жойи кўрсатилган паспорти нусхаси.

12. Ўқишни кўчириш тўғрисидаги ариза таълим муассасаси директори, ўрта махсус, касб-хунар таълими ҳудудий бошқармаси ёки Ўрта махсус, касб-хунар таълими маркази томонидан ариза берилган кундан бошлаб 15 кун мобайнида кўриб чиқилади.

Ўрта махсус, касб-хунар таълими марказининг ёзма жавоби тегишли ўрта махсус, касб-хунар таълими ҳудудий бошқармасига юборилади. Ўрта махсус, касб-хунар таълими ҳудудий бошқармаси олинган жавоб асосида ариза берувчининг ва тегишли таълим муассасаларининг манзилига хат юборади.

Таснифлагичга мувофиқ ўқувчининг билимларнинг бир соҳаси ичида, бир минтақа доирасида жойлашган таълим муассасасига ўқишни кўчириш тўғрисидаги аризаси ўрта махсус, касб-хунар таълими ҳудудий бошқармаси томонидан кўриб чиқилади, натижалар ҳақида ариза берувчига ва таълим муассасаларига ёзма хабар берилади.

Ўқувчининг ўқишини кўчириш тўғрисида ижобий қарор чиқарилганда ўқувчини қабул қилувчи ўрта махсус, касб-хунар таълими муассасаси 3 кун муддатда ўқувчи таҳсил олган ўрта махсус, касб-хунар таълими муассасасига ўқувчининг ҳужжатларини жўнатиш тўғрисида сўровнома юборади.

Ўқувчи бунгача ўқиган таълим муассасаси ушбу сўровнома асосида 3 кун муддатда ўқувчининг ҳужжатларини янги ўқиш жойига юборади.

Ўқувчининг ҳужжатлар йиғмажилди ўқувчининг ўзига - ариза берувчига ёки унинг ота-оналарига (уларнинг ўрнини босувчи шахсларга) берилишига йўл қўйилмайди.

Ўқувчини қабул қилувчи ўрта махсус, касб-хунар таълими муассасаси директори қонун ҳужжатларида белгиланган тартибда 10 кун муддатда ўқувчиларни ўқишга қабул қилиш тўғрисида буйруқ чиқариши шарт.

III. ЎҚИШНИ ҚАЙТА ТИКЛАШ ТАРТИБИ

13. Ўқувчиларни ўқишга қайта тиклаш учун ўқувчи вояга етмаган бўлса унинг ота-онасидан бири (ёки уларнинг ўрнини босувчи шахслар) четлаштириш сабабларини кўрсатган ҳолда ўрта махсус, касб-хунар таълими муассасаси директори номига ариза бериши керак.

14. Ўқувчининг, ўқувчи вояга етмаган бўлса унинг ота-онасидан бирининг (ёки уларнинг ўрнини босувчи шахсларнинг) ўқувчини ўқишга қайта тиклаш ҳақидаги аризаси ариза берилган кундан бошлаб 15 кун муддатда кўриб чиқилади.

15. Ўқувчини бошқа ўрта махсус, касб-ҳунар таълими муассасасига ўқишга қайта тиклашда у олдин ўқиган ўрта махсус, касб-ҳунар таълими муассасасининг розилиги талаб этилмайди.

16. Ўқувчи олдин ўқиган тайёрлов йўналиши тўхтатилган бўлса, унинг хоҳишига кўра турдош тайёрлов йўналишига ўқишни тиклаш мумкин.

17. Ўрта махсус, касб-ҳунар таълими муассасаси белгиланган давлат таълим стандартларига мувофиқ ўқишнинг таълим дастурини бажарган, бироқ якуний давлат аттестациясида иштирок этмаган ёки ундан ўтмаган 3-босқич ўқувчилари Педагогик кенгаш қарори асосида якуний давлат аттестация комиссияси фаолият кўрсатаётган даврда 3 йил мобайнида якуний давлат аттестациясини қайта топшириш ҳуқуқига эга.

3 йил мобайнида якуний давлат аттестациясини топширмаган ўқувчилар ушбу Низомга мувофиқ 3-босқичда қайта ўқиш учун ариза бериши мумкин.

IV. ЎҚУВЧИЛАР САФИДАН ЧЕТЛАШТИРИШ ТАРТИБИ

18. Ўрта махсус, касб-ҳунар таълими муассасаси ўқувчилари қуйидаги ҳолларда ўқишдан четлаштирилиши мумкин:

а) саломатлиги туфайли (тиббий комиссия маълумотномаси асосида) академик таътил олганда;

б) ўқиши бошқа таълим муассасасига кўчирилиши муносабати билан;

в) доимий яшаш учун бошқа давлатга чиқиб кетганда;

г) суднинг қарори билан озодликдан маҳрум этилганда;

д) вафот этганлиги сабабли.

19. Ўрта махсус, касб-ҳунар таълими муассасасининг академик қарздорликка (ўзлаштирмасликка) эга бўлган ёки ўқув режаси талабларини бажармаган (ишлаб чиқариш ёки диплом олди амалиётидан ўтмаган, курс ишини топширмаган, 3 ва ундан ортиқ фан бўйича "қониқарсиз" якуний йиллик баҳо олган) ўқувчилари Педагогик кенгашнинг қарори бўйича ўқув йили тамом бўлгач бир йил такроран ўқиш учун курсда қолдирилиши мумкин.

Ўрта махсус, касб-ҳунар таълими муассасалари ўқувчиларини бир йил такроран ўқиш учун курсда қолдириш тартиби Соғлиқни сақлаш вазирлиги, Маданият ва спорт ишлари вазирлиги ва Бадий академия билан келишган ҳолда Олий ва ўрта махсус таълим вазирлигининг Ўрта махсус, касб-ҳунар таълими маркази томонидан белгиланади.

Ўқишдан четлаштирилган ёки ўқиш учун такрорий муддатга қолдирилган ўқувчилар тўғрисидаги маълумотлар ўрта махсус, касб-ҳунар таълими муассасаси директори томонидан тегишли туман (шаҳар) ҳокимликлари ҳузуридаги вояга етмаганлар ишлари бўйича комиссияга тақдим этилади.

V. ЯКУНЛОВЧИ ҚОИДАЛАР

20. Ўқиши кўчирилган ёки ўқишга тикланган ўқувчиларнинг шахсий ҳужжатлар йиғма жилдига ариза, буйруқ ва белгиланган намунадаги рейтинг дафтарча нусхалари тикиб қўйилади.

21. Ўқувчиларнинг ўқишини кўчиришда, уларни ўқишга тиклаш ва ўқишдан четлаштиришда ҳужжатларнинг ишончилиги ва тўғри расмийлаштирилганлиги учун жавобгарлик ўрта махсус, касб-хунар таълими муассасаси директорига юкланади.

22. Ўрта махсус, касб-хунар таълими муассасалари ўқувчиларининг ўқишини кўчириш, уларни ўқишга тиклаш ва ўқишдан четлаштириш учун асос бўлиб хизмат қилган барча ҳужжатлар мансублиги бўйича ўрта махсус, касб-хунар таълимининг тегишли ҳудудий бошқармаларида, ўз тасарруфида ўрта махсус, касб-хунар таълими муассасаларига эга бўлган вазирликлар ва идораларда белгиланган тартибда сақланиши керак.

23. Ўқувчилар ўқишини кўчириш, уларни ўқишга қайта тиклаш ва ўқишдан четлаштириш тўғрисидаги қарордан норози бўлганлар белгиланган тартибда Ўзбекистон Республикаси Олий ва ўрта махсус таълим вазирлигининг Ўрта махсус, касб-хунар таълими марказига ёки суд органларига мурожаат қилиш ҳуқуқига эгадир.

24. Ушбу Низом талаблари бузилишида айбдор бўлган шахслар қонун ҳужжатларида белгиланган тартибда жавоб берадилар.

"Ўзбекистон Республикаси қонун ҳужжатлари тўплами", 2013 йил, 1-сон, 6-модда

**Ҳарбий академик лицейлар ўқувчиларини ўқишдан четлаштириш ва
бошқа таълим муассасасига ўтказиш тартиби тўғрисида
НИЗОМ**

- I. Умумий қоидалар
II. Ўқувчиларни ҳарбий академик лицейдан четлаштириш
ва бошқа таълим муассасасига ўтказиш тартиби
III. Яқунловчи қоидалар

I. УМУМИЙ ҚОИДАЛАР

1. Ушбу Низом "Таълим тўғрисида"ги Ўзбекистон Республикаси Қонунига, Ўзбекистон Республикаси Вазирлар Маҳкамасининг "Ҳарбий академик лицейлар фаолиятини янада такомиллаштириш чора-тадбирлари тўғрисида" 2010 йил 17 февралдаги 21-сон қарори билан тасдиқланган Ҳарбий академик лицей тўғрисидаги Низомга мувофиқ ишлаб чиқилган ҳамда ҳарбий академик лицейлар ўқувчиларини ўқишдан четлаштириш ва бошқа таълим муассасасига ўтказиш тартибини белгилайди.

2. Ҳарбий академик лицейлар ўқувчиларини ўқишдан четлаштириш ва бошқа таълим муассасасига ўтказиш масалалари бўйича қарор Ўзбекистон Республикаси ўқувчиларининг ўрта махсус, касб-хунар таълими олишга бўлган ҳуқуқларини таъминлаш ҳисобга олинган ҳолда қабул қилинади.

3. Ўқувчиларни бошқа таълим муассасаларидан ҳарбий академик лицейларга ўтказиш тақиқланади.

4. Ўқишдан четлаштирилганларни тиклаш, шунингдек ўқувчиларни бир ҳарбий академик лицейдан бошқа ҳарбий академик лицейга ўтказиш тақиқланади.

5. Ўқувчиларни ҳарбий академик лицейдан четлаштириш ва бошқа таълим муассасасига ўтказиш бепул амалга оширилади.

**II. ЎҚУВЧИЛАРНИ ҲАРБИЙ АКАДЕМИК ЛИЦЕЙДАН
ЧЕТЛАШТИРИШ ВА БОШҚА ТАЪЛИМ МУАССАСАСИГА
ЎТКАЗИШ ТАРТИБИ**

6. Ўқувчиларни ҳарбий академик лицейдан четлатиш ва бошқа ўрта махсус, касб-хунар таълими муассасасига ўтказиш қуйидаги ҳолларда амалга оширилади:

- а) соғлиғи туфайли (тиббий комиссиянинг маълумотномаси асосида);
- б) ҳарбий академик лицейда ўқишни хоҳламаслик;
- в) академик ўзлаштирмаслик, бир семестр мобайнида икки ҳафта давомида (76 соат) узрли сабабларсиз машғулотларда қатнашмаслик;
- г) ҳарбий академик лицейнинг ички тартибини қўпол равишда бузиш;
- д) суднинг қарорига кўра озодлиқдан маҳрум этиш;

е) вафот этганлиги муносабати билан.

7. Педагогик кенгашнинг ўқувчиларни ҳарбий академик лицейдан четлаштириш ва бошқа таълим муассасасига ўтказиш тўғрисидаги қарори ҳамда ҳарбий академик лицей директорининг ёзма мурожаати асосида ўрта махсус, касб-ҳунар таълими ҳудудий бошқармаси Ўзбекистон Республикаси Олий ва ўрта махсус таълим вазирлигининг Ўрта махсус, касб-ҳунар таълими марказига расмий хат билан мурожаат қилади.

8. Хатга қуйидаги ҳужжатлар илова қилинади:

а) ўқувчилар ва улар ота-оналарининг (ёки уларнинг ўрнини босувчи шахсларнинг) Ўрта махсус, касб-ҳунар таълими маркази директори номига бошқа таълим муассасасига ўтказиш (ушбу Низомнинг 6-банди "д" ва "е" кичик бандлари бундан мустасно) тўғрисидаги аризаси;

б) ўқувчиларнинг белгиланган намунадаги тўлдирилган ва тасдиқланган рейтинг дафтарчаси нусхаси;

в) тиббий комиссиянинг маълумотномаси (зарур ҳолларда);

г) белгиланган намунадаги яшаш жойидан берилган маълумотнома (вояга етмаганлар учун - доимий яшаш жойи кўрсатилган ҳолда уларнинг ота-оналарининг ёки уларнинг ўрнини босувчи шахсларнинг паспортлари нусхаси).

9. Ҳарбий академик лицей ўқувчиларини ўқишдан четлатиш ва бошқа ўрта махсус, касб-ҳунар таълими муассасасига ўтказиш тўғрисидаги хат Ўрта махсус, касб-ҳунар таълими маркази томонидан бир ой муддатда кўриб чиқилади ва Ўрта махсус, касб-ҳунар таълими марказининг тегишли буйруғи қабул қилинади.

10. Ҳарбий академик лицей директори Ўрта махсус, касб-ҳунар таълими марказининг буйруғи асосида уч кун мобайнида ўқувчиларнинг шахсий ҳужжатлар йиғма жилдини ўқувчи ўтказилаётган таълим муассасасига юборади.

11. Қабул қилувчи ўрта махсус, касб-ҳунар таълими муассасаси директори 10 кун мобайнида ўқувчиларни ўқишга қабул қилиш тўғрисида белгиланган тартибда буйруқ чиқаради.

12. Ўқувчиларни ўтказиш учун ҳужжатларни расмийлаштиришда ўрта махсус, касб-ҳунар таълими муассасаси директори белгиланган тартибда академик қарздорликни ёки ўқув режалари ва дастурларидаги фарқни, уларни топшириш муддатларини (икки ойдан ортиқ эмас) ва тартибини, ўқиш босқичини белгилайди.

13. Ўқувчиларни ўтказиш тўғрисидаги буйруқ, ариза ва рейтинг дафтарча ўқувчиларнинг шахсий ҳужжатлар йиғма жилдида сақланади.

Шахсий ҳужжатлар йиғма жилдини ўқувчиларнинг қўлига ёки уларнинг ота-оналарига (ёки уларнинг ўрнини босувчи шахсларга) бериш тақиқланади.

III. ЯКУНЛОВЧИ ҚОИДАЛАР

14. Ўқувчиларни ҳарбий академик лицейдан четлаштириш ва бошқа таълим муассасасига ўтказиш тўғрисидаги тақдим этилган ҳужжатларнинг тўғри расмийлаштирилиши ва ишончлилиги учун жавобгарлик ўрта махсус, касб-ҳунар таълим муассасалари директорларига юкланади.

15. Зарур ҳолларда Ўрта махсус, касб-ҳунар таълими маркази ҳарбий академик лицейга тақдим этилган ҳужжатларнинг тўғрилиги ва ишончилигини тасдиқлашни илтимос қилиб расмий хат билан мурожаат қилиши мумкин.

16. Ўқувчиларни ҳарбий академик лицейдан четлатиш ва бошқа таълим муассасасига ўтказиш учун асос бўлган ҳужжатлар белгиланган тартибда Ўрта махсус, касб-ҳунар таълими марказида сақланади.

17. Ўқувчиларни ҳарбий академик лицейдан четлатиш ва бошқа таълим муассасасига ўтказишдан норози бўлган шахслар белгиланган тартибда Ўрта махсус, касб-ҳунар таълими марказига ёки суд органларига мурожаат қилиш ҳуқуқига эгадир.

18. Ушбу Низом талаблари бузилишида айбдор бўлган шахслар қонун ҳужжатларида белгиланган тартибда жавоб берадилар.

"Ўзбекистон Республикаси қонун ҳужжатлари тўплами", 2013 йил, 1-сон, 6-модда